

環之無窮夫萬物非欲生不得不生萬物非欲死不得死
任他塵生塵滅萬死萬生不能脫離苦海劫劫生生輪迴不
已無終無始如汲井輪三界凡夫無一不遭此沉溺故世人
莫知生從何來盍參父母未生前生從何來知來然後知生
處世人莫問死從何去盍參魂遊魄降後死從何去知去然
後知死處死之機由於生生之機原於死無死機不死無生
機不生生死之機兩相攖世人所以有生死生死之機不相
關至人所以超生死有生死者身也無生死者心也敦復則
心生迷復則心死故仙佛愍之說一切眾生俱有本來一靈
真覺但昏惑不見使天命之性浪化遷流轉轉不悟而世世
墮落失身於異類透靈於別殼至真性根不復於人我當以
聖道令眾生永離妄想能致自身如仙家之長生佛氏之不
死云耳

玄宗正脈傳心直指三要

一曰明理定心事理渾融而神清名曰智人
二曰神入氣室心氣和平而神凝名曰真人
三曰氣入神室物我兩忘聖智俱絕而神通名曰至人
經曰慧照十方虛變無爲 又偈云心是一身靈神爲三
元主道人如會得卷盡萬家書心神之內識心神竅妙盡

歸虛